



TITAH UCAPAN
DULI YANG MAHA MULIA
SULTAN IBRAHIM IBNI ALMARHUM SULTAN ISKANDAR,
SULTAN YANG DIPERTUAN BAGI
NEGERI DAN JAJAHAN TAKLUK
JOHOR DARUL TA'ZIM

MERASMIKAN

PEMBUKAAN PENGGAL PERSIDANGAN KEDUA
DEWAN NEGERI JOHOR YANG KE LIMA BELAS

PADA
HARI KHAMIS 16 MAC 2023

DI BANGUNAN SULTAN ISMAIL, KOTA ISKANDAR,
ISKANDAR PUTERI, JOHOR BAHRU.

**ASSALAMMU ALAIKUM WARAHMATULLAHHI WABARAKAATUH
BISMILLAH HIRRAHMAAN NIRRAHIM**

1. DENGAN NAMA ALLAH, YANG MAHA PEMURAH LAGI MAHA MENGASIHANI. SEGALA PUJI BAGI ALLAH, TUHAN PENTADBIR SELURUH ALAM. SELAWAT DAN SALAM, KEPADA JUNJUNGAN BESAR KITA NABI MUHAMMAD, SEMULIA-MULIA RASUL, SERTA KELUARGA, DAN PARA SAHABATNYA SEKALIAN.
2. ALHAMDULILLAH, BERSYUKUR SAYA KE HADRAT ALLAH SUBHANAHU WATAALA KERANA DENGAN LIMPAH KURNIA DAN IZIN-NYA DAPAT SAYA HADIR MERASMIKAN PEMBUKAAN PENGGAL PERSIDANGAN KEDUA BAGI DEWAN NEGERI JOHOR YANG KE LIMA BELAS PADA PAGI INI.
3. PADA DUA MINGGU YANG LALU, NEGERI JOHOR TELAH DITIMPA BENCANA BANJIR YANG SANGAT BESAR, DAN SEHINGG KE HARI INI MASIH TERDAPAT BANYAK KAWASAN YANG BELUM PULIH SEPENUHNYA, TERUTAMA DI DAERAH BATU PAHAT.
4. SAYA INGIN MENZAHIRKAN RASA SEDIH DAN SIMPATI TERHADAP RAKYAT SAYA YANG TERPAKSA BERHADAPAN DENGAN MUSIBAH BANJIR YANG SANGAT MENCABAR INI. SAYA HARAP MEREKA SENTIASA SABAR DAN TABAH DALAM MENGHADAPI UJIAN DAN DUGAAN INI.
5. BANJIR YANG BERLAKU KALI INI ADALAH BERPUNCA DARIPADA TABURAN HUJAN YANG LUAR BIASA, IAITU HAMPIR DUA KALI GANDA BANYAKNYA DARIPADA PURATA TABURAN HUJAN BULANAN. MALAH, JUMLAH HUJAN YANG TURUN SELAMA 2 HARI, IAITU PADA 28 FEBRUARI DAN 1 MAC 2023, TELAH MELEBIHI REKOD JUMLAH TABURAN HUJAN SEBULAN.
6. SECARA KESELURUHANNYA, BANJIR PADA KALI INI TELAH MEREKODKAN SERAMAI 74,453 ORANG MANGSA DARIPADA 26,376 KELUARGA, DI SEMUA 10 DAERAH, DAN MELIBATKAN SEBANYAK 379 PUSAT PEMINDAHAN SEMENTARA.
7. SUKA SAYA MERAKAMKAN UCAPAN PENGHARGAAN KEPADA SEMUA PETUGAS YANG TELAH BEKERJA BERTUNGKUS-LUMUS, SIANG DAN MALAM UNTUK MEMBANTU DAN MENYELAMATKAN MANGSA-MANGSA BANJIR.
8. TERIMA KASIH JUGA SAYA UCAPKAN KEPADA SEMUA PIHAK YANG TELAH MENGHULURKAN SUMBANGAN KEWANGAN, BEKALAN MAKANAN DAN KEPERLUAN HARIAN, ALATAN PEMBERSIHAN, DAN YANG PALING PENTING ADALAH BANTUAN TENAGA SUKARELA YANG DATANG DARI SELURUH PELUSUK TANAH AIR.

9. SAYA AMAT BERBANGGA DENGAN SEMANGAT KERJASAMA DAN BANTU-MEMBANTU YANG DIBERIKAN TANPA MENGIRA KAUM ATAU AGAMA. INILAH BUDAYA HIDUP MASYARAKAT KITA YANG MESTI DIPERTAHANKAN, "IBARAT AUR DENGAN TEBING", "BERAT SAMA DIPIKUL, RINGAN SAMA DIJINJING".
10. TIDAK LUPA JUGA SAYA UCAPKAN BERBANYAK TERIMA KASIH KEPADA PERDANA MENTERI MALAYSIA DAN KERAJAAN PUSAT YANG TELAH MEMBERIKAN PERUNTUKAN KEWANGAN BAGI MERINGANKAN BEBAN MANGSA BANJIR, SERTA MELULUSKAN PROJEK RANCANGAN TEBATAN BANJIR DI DAERAH KOTA TINGGI, SEGAMAT DAN BATU PAHAT, UNTUK DILAKSANAKAN DENGAN SEGERA.
11. SELEPAS BENCANA INI BERAKHIR, SAYA HARAP KERAJAAN PUSAT AKAN MEMBERIKAN PERUNTUKAN KHAS UNTUK MEMBAIK-PULIH INFRASTRUKTUR AWAM YANG TELAH ROSAK DAN HARTA BENDA YANG TELAH MUSNAH.
12. SAYA JUGA MENYERU KEPADA ORANG RAMAI, UNTUK MENGHULURKAN BANTUAN DAN SUMBANGAN KEPADA MANGSA-MANGSA BANJIR AGAR MEREKA DAPAT MEMBAIKI RUMAH YANG TELAH ROSAK DAN MENGGANTIKAN PERABOT DAN ALATAN RUMAH YANG TELAH MUSNAH.
13. MASALAH BANJIR INI JUGA, ADALAH KESAN DARIPADA PERUBAHAN IKLIM DUNIA, OLEH ITU, SAYA MENGESA KEPADA SEMUA BANGSA JOHOR SUPAYA MEMBUDAYAKAN AMALAN MESRA ALAM, MENJAGA KEBERSIHAN, DAN MENGURANGKAN PENCEMARAN ALAM SEKITAR.
14. SETELAH GENAP SATU TAHUN AHLI-AHLI DEWAN NEGERI JOHOR DIPILIH DAN DILANTIK, SAYA BOLEH KATAKAN YANG SAYA BERPUASHATI DENGAN TINGKAH-LAKU DAN PERANAN YANG TELAH DIJALANKAN OLEH SETIAP AHLI DEWAN. TETAPI SELEPAS INI, JANGANLAH DIBAWA SEMULA PERANGAI LAMA YANG JELEK DAN TIDAK SENONOH, AGAR TIDAK PERLU SAYA INGATKAN LAGI, JANGAN JADIKAN DEWAN INI SEPERTI APA.
15. SETIAP AHLI DEWAN HARUS SENTIASA MENJAGA IMEJ DAN TINGKAHLAKU KERANA GELARAN "YANG BERHORMAT" KENALAH SESUAI DENGAN ORANGNYA.
16. SAYA JUGA BERPENDAPAT, GELARAN "PEMBANGKANG" YANG DIBERIKAN KEPADA AHLI DEWAN DI PIHAK BUKAN KERAJAAN ADALAH KURANG SESUAI KERANA PERANAN MEREKA BUKANLAH HANYA MEMBANGKANG SEGALA CADANGAN KERAJAAN. Z

17. MEREKA BERTANGGUNG-JAWAB UNTUK MENJADI PENGIMBANG DAN PEMERIKSA TERHADAP TINDAKAN KERAJAAN SUPAYA TIDAK BERBUAT SESUKA HATI. NAMUN BEGITU, JANGANLAH PULA ADA SIKAP MEMBALAS DENDAM ATAU SUKA Mencari SALAH KERAJAAN SAHAJA. SAYA JUGA TIADA MASALAH DENGAN PIHAK PENGIMBANG KERAJAAN. MEREKA BOLEH MENGHADAP SAYA DAN BERIKAN PENDAPAT ATAU IDEA MEREKA.
18. SAYA SANGAT BERHARAP KEADAAN POLITIK YANG STABIL INI TERUS DIKEKALKAN DAN SEMUA PIHAK BEKERJASAMA DEMI UNTUK RAKYAT DAN NEGERI JOHOR.
19. SAYA JUGA MEMANTAU PRESTASI KERJA MENTERI BESAR DAN AHLI-AHLI EXCO KERAJAAN NEGERI. SETAKAT INI SAYA LIHAT MEREKA TELAH BEKERJA DENGAN BAIK DAN SEMPURNA. WALAUPUN ADA YANG KURANG BERPENGALAMAN, MEREKA TELAH BERUSAHA BERSUNGGUH-SUNGGUH UNTUK MEMBUKTIKAN KEBOLEHAN MEREKA.
20. KALAU TIDAK FAHAM TENTANG SESUATU PERKARA, MEREKA BOLEH DATANG DAN TANYA SAYA. PEGAWAI-PEGAWAI TADBIR NEGERI JUGA ADA UNTUK MEMBANTU MELICINKAN SEGALA TUGAS DAN MENYELARAS SEGALA PROGRAM YANG HENDAK DIBUAT.
21. PENGURUSAN KEWANGAN KERAJAAN ADALAH PERKARA PENTING YANG SELALU SAYA TEKANKAN. KERAJAAN MESTI MEMPUNYAI KEWANGAN YANG KUKUH DAN TIDAK MENANGGUNG HUTANG YANG BANYAK.
22. SYABAS SAYA UCAPKAN KEPADA PIHAK KERAJAAN YANG TELAH BERJAYA MEREKODKAN LEBIHAN HASIL PADA TAHUN LEPAS BERBANDING BAKI DEFISIT PADA TAHUN SEBELUMNYA. WALAUPUN LEBIHAN ITU TIDAK BESAR, SEKURANG-KURANGNYA KITA TIDAK BELANJA LEBIH DARI HASIL YANG KITA KUTIP.
23. SAYA HARAP PRESTASI KEWANGAN KERAJAAN AKAN LEBIH BAIK PADA TAHUN INI KERANA AKTIVITI PEMBANGUNAN EKONOMI DILIHAT SEMAKIN RANCAK TERUTAMA DALAM SEKTOR PEMBANGUNAN HARTANAH DAN INDUSTRI.
24. SETIAP JABATAN JUGA MESTILAH PATUH KEPADA ARAHAN PERBELANJAAN YANG BERHEMAH DAN LANGKAH BERJIMAT CERMAT, SERTA PASTIKAN SEMUA PEROLEHAN DIBUAT DENGAN TELUS, CEKAP, DAN MENGIKUT KONSEP "VALUE FOR MONEY".

25. SAYA INGIN MENGAMBIL KESEMPATAN DISINI UNTUK MERAKAMKAN UCAPAN TERIMA KASIH KEPADA YANG AMAT BERHORMAT DATO' SERI ANWAR IBRAHIM YANG TELAH MENDENGAR PERMINTAAN JOHOR DENGAN MEMBERIKAN PERUNTUKAN DALAM BAJET 2023 UNTUK MENAIK-TARAF LEBUHRAYA UTARA-SELATAN, DARI YONG PENG KE SENAI, KEPADA 6 LORONG.
26. KERAJAAN PUSAT JUGA AKAN MENYEDIAKAN LORONG MEMOTONG DI LEBUHRAYA SENAI-DESARU, DARI PASIR GUDANG KE BANDAR PENAWAR, YANG MERUPAKAN SATU-SATUNYA LEBUHRAYA DI MALAYSIA YANG HANYA ADA 2 LORONG DAN DIKENAKAN BAYARAN TOL.
27. SAYA JUGA BERHARAP AGAR BAJET PEMBAIKAN JALAN PERSEKUTUAN AKAN DISALURKAN UNTUK MEMBAIKI LEBUHRAYA PASIR GUDANG DAN JALAN JOHOR BAHRU KE MERSING YANG BERLUBANG-LUBANG DAN MERBAHAYA KEPADA PENGGUNA JALAN RAYA.
28. SAYA JUGA MENYAHUT BAIK CADANGAN KERAJAAN PERSEKUTUAN BAGI MEWUJUDKAN "ZON KHAS KEWANGAN" DI KAWASAN ISKANDAR MALAYSIA YANG AKAN MENARIK LEBIH RAMAI PELABUR UNTUK MENJALANKAN PERNIAGAAN DI NEGERI JOHOR.
29. DENGAN SOKONGAN DAN KERJASAMA YANG PADU ANTARA KERAJAAN NEGERI DAN PERSEKUTUAN, SAYA PERCAYA JOHOR AKAN MAJU MEMBANGUN DAN SEMUA RAKYATNYA AKAN KECAPI HIDUP SEJAHTERA.
30. TAHNIAH JUGA SAYA UCAPKAN KEPADA KERAJAAN KERANA BERJAYA MELETAKKAN SEMULA KEDUDUKAN NEGERI JOHOR DITANGGA NOMBOR SATU, BAGI PELABURAN TERTINGGI YANG DILULUSKAN PADA TAHUN 2022, IAITU SEBANYAK RM70.6 BILION.
31. NAMUN BEGITU, NILAI PELABURAN YANG DILULUSKAN INI BELUM LAGI TERLAKSANA PROJEKNYA. OLEH ITU, SEMUA PIHAK PERLU BERKERJASAMA MEMBERIKAN PERKHIDMATAN YANG CEKAP, TANPA ADA "RED TAPE" SUPAYA PELABUR BOLEH MEMULAKAN PERNIAGAAN MEREKA DENGAN SEGERA. JANGAN MELAMBAT-LAMBATKAN SEGALA URUSAN KERAJAAN.
32. INGIN SAYA INGATKAN KEPADA SEMUA PIHAK BERKUASA TEMPATAN AGAR MEMASTIKAN SETIAP PEMBANGUNAN YANG HENDAK DIBUAT DI KAWASAN BERBUKIT ATAU TANAH TINGGI, MESTILAH MENGEKALKAN BENTUK MUKABUMI ATAU TOPOGRAFI ASAL TANAH ITU SEBERAPA BOLEH.

34. PIHAK PEMAJU TIDAK WAJAR DIBENARKAN UNTUK MERATAKAN PERMUKAAN TANAH KESEMUANYA. JIKA KERJA PEMOTONGAN BUKIT PERLU DIBUAT, IANYA MESTI DIKAWAL DAN DILAKUKAN SECARA MINIMA. SAYA HARAP SEMUA DATUK BANDAR DAN Y.D.P AKAN SELIDIK DAHULU BETUL-BETUL SEBELUM MELULUSKAN SEMUA PELAN KERJA TANAH.
35. MULAI SEKARANG JUGA, SAYA MENGESA SEMUA MAJLIS AGAR TIDAK MELULUSKAN SEBARANG KEBENARAN MERANCANG (K.M), JIKA PEMAJU TIDAK MENYEDIAKAN LALUAN PEJALAN KAKI DAN LORONG BERBASIKAL DI DALAM PELAN LAYOUT MEREKA.
36. SEJAK DARI DAHULU LAGI, KERAJAAN SENTIASA MENJAGA KEBAJIKAN ORANG ASLI DI NEGERI JOHOR DENGAN MELAKSANAKAN PELBAGAI PROJEK PEMBANGUNAN DAN PEMBERIAN BANTUAN BAGI MENAIK-TARAF KEHIDUPAN MEREKA.
37. KERAJAAN JUGA TELAH MENYEDIAKAN KAWASAN PENEMPATAN ORANG ASLI YANG LEBIH TERSUSUN DENGAN KEMUDAHAN BEKALAN AIR DAN ELEKTRIK, SERTA KEMUDAHAN AWAM YANG LAIN UNTUK MEMBERIKAN KESELESAAN KEPADA MEREKA. NAMUN BEGITU, SAYA MERASA KECEWA APABILA ADA SEGELINTIR ORANG ASLI YANG MEMBUKA KAWASAN HUTAN SIMPAN KERAJAAN UNTUK DIJADIKAN LADANG GETAH DAN KELAPA SAWIT SECARA BESAR-BESARAN.
38. SAYA PERCAYA ADA ORANG LUAR YANG MENJADI DALANG DI DALAM HAL INI, DAN CUBA MENGAMBIL KESEMPATAN DENGAN MENGGUNAKAN HAK ORANG ASLI SEBAGAI ALASAN. MALAH ADA JUGA YANG CUBA MENUNTUT “KAWASAN RAYAU” YANG TIDAK MASUK AKAL. KALAU HENDAK DIKUTKAN, SEMUA YANG ADA DI DALAM DEWAN INI PUN BANYAK TEMPAT MERAYAU.
39. SUKA SAYA INGATKAN, WALAUPUN KEDUDUKAN ORANG ASLI DILINDUNGI OLEH PERLEMBAGAAN, MEREKA JUGA WAJIB PATUH KEPADA UNDANG-UNDANG YANG ADA. PENCEROBOHAN HUTAN ADALAH SALAH, DAN ORANG ASLI JUGA TIDAK TERKECUALI.
40. KERAJAAN MESTI TEGAS DALAM TINDAKAN YANG DIAMBIL DAN MEMBUAT PEMANTAUAN SECARA BERTERUSAN UNTUK MENJAGA KHAZANAH HUTAN DAN MELINDUNGI HIDUPAN LIAR.
41. SAYA MENGESA KEPADA KERAJAAN SUPAYA MELETAKKAN SEMUA KAWASAN PENEMPATAN DAN RIZAB ORANG ASLI DI BAWAH “SULTANATE LAND” SUPAYA TIDAK ADA MANA-MANA PIHAK YANG BOLEH BERBUAT SESUKA HATI. JANGAN SAMPAI “PISANG BERBUAH DUA KALI”, MENGULANGI KESILAPAN DAHULU SEPERTI KES ORANG ASLI DI BEKOK.

42. INGIN SAYA TEGASKAN DI SINI BAHAWA MANA-MANA PENCERAMAH AGAMA YANG HENDAK MENYAMPAIKAN CERAMAH DI DALAM NEGERI JOHOR, MESTILAH MEMILIKI TAULIAH DARIPADA MAJLIS AGAMA ISLAM NEGERI JOHOR.
43. SEMUA AHLI JAWATANKUASA MASJID DAN SURAU YANG HENDAK MENGANJURKAN CERAMAH AGAMA WAJIB MENDAPATKAN KEBENARAN DARIPADA MAJLIS AGAMA ISLAM JOHOR MELALUI PEJABAT KADI DAERAH, DAN NYATAKAN MENGENAI TAJUK DAN PERKARA YANG AKAN DISAMPAIKAN.
44. SEKIRANYA ADA MANA-MANA MASJID ATAU SURAU YANG GAGAL MEMATUHI PERATURAN INI, MAKA SEMUA AHLI JAWATANKUASANYA AKAN DIAMBIL TINDAKAN DAN DIPECAT.
45. TINDAKAN INI BUKANLAH UNTUK MENGHALANG PROGRAM PENYEBARAN SYIAR ISLAM, TETAPI ADALAH UNTUK MENGAWAL PENYEBARAN FAHAMAN YANG MENYELEWENG ATAU TERPESONG DARIPADA HUKUM SYARAK YANG BERLANDASKAN AQIDAH AHLI SUNNAH WAL JAMAAH DI NEGERI JOHOR.
46. KAEDAH INI JUGA ADALAH UNTUK MENGAWAL GOLONGAN PELAMPAU AGAMA YANG BOLEH MENCETUSKAN KEKELIRUAN KEPADA UMAT ISLAM DAN GOLONGAN MUDA YANG KURANG BERILMU.
47. SEHUBUNGAN ITU JUGA, KERAJAAN HARUS MENINGKATKAN MUTU PENDIDIKAN DI SEKOLAH-SEKOLAH DAN PUSAT PENGAJIAN TINGGI BAGI MELAHIRKAN GENERASI MASA HADAPAN YANG TINGGI ILMU PENGETAHUAN.
48. AKHIR KATA, SEKALI LAGI SAYA MERAKAMKAN SETINGGI-TINGGI PENGHARGAAN KEPADA PEGAWAI-PEGAWAI DAERAH, PARA PETUGAS DAN SUKARELAWAN, SERTA SEMUA PIHAK YANG TERLIBAT DALAM MEMBANTU MANGSA BANJIR DI NEGERI JOHOR. SEMOGA BENCANA INI SEGERA BERANSUR PULIH DAN KEHIDUPAN RAKYAT YANG SELESA DAN SEJAHTERA DAPAT DIKECAPI SEMULA.
49. MARILAH KITA BERDOA KEHADRAT ALLAH SUBHAANA WATA'ALLAH, SEMOGA NEGERI JOHOR TERUS MAJU MEMBANGUN DENGAN AMAN DAN MAKMUR, DIJAUHI DARIPADA SEGALA BALA BENCANA, AGAR SELURUH RAKYATNYA DAPAT HIDUP HARMONI, BERSATU-PADU, DAN BAHAGIA.
50. DENGAN LAFAZ, **BISMILLAHIR RAHMANIR RAHIM**, SAYA MERASMIKAN **PERSIDANGAN PENGGAL KEDUA BAGI DEWAN NEGERI JOHOR YANG KE LIMA BELAS**. SEKIAN, WABILLAHI TAUFIK WALHIDAYAH WASSALAMUALAIKUM WARAHMATULLAHI WABARAKAATUH.